

四庫全書

史部

欽定四庫全書

浙江通志卷一百八

祥異<sup>上</sup>

洪範休咎有徵春秋襍祥竝紀漢唐以來五行符  
瑞史不絕書而於凝承修省之道尚多畧焉

盛朝景運郅隆浙省嘉祥疊見而

聖心常懷乾惕不言瑞應特以天人相感之理

宣諭臣民諄諄誥誡所以迓天庥而儆人事者至深切

矣志祥異

漢

漢書天文志景帝元年正月癸亥金水合於婺女

宋書符瑞志漢高后景帝時會稽人朱仲獻三寸四寸珠

漢書天文志建平二年二月彗星出牽牛七十餘日

後漢書天文志永平七年正月戊子流星大如杯從

織女西行光照地

後漢書天文志建初元年八月彗星出天市入牽牛

三度積四十日

後漢書和帝本紀永元六年四月會稽大疫

後漢書天文志元初四年九月辛巳太白入南斗口中

後漢書天文志永建六年十二月壬申客星芒長二

尺餘色蒼白在牽牛六度

後漢書天文志永和二年八月庚子熒惑犯南斗

後漢書天文志永和四年七月壬午熒惑入南斗犯

第二星

後漢書天文志熹平元年十月熒惑入南斗中

三國

冊府元龜黃龍三年夏吳興野蠶成繭大如卵由拳

野稻自生十月會稽嘉禾生

宋書符瑞志赤烏五年三月海鹽黃龍見井中二

宋書符瑞志赤烏十二年六月寶鼎出臨平湖八月

癸丑白鳩見章安

三國吳志五鳳元年十一月星茀於斗牛

三國吳志太平元年九月壬辰太白犯南斗

冊府元龜永安三年三月西陵赤鳥見是歲得大鼎

於建德縣

晉書五行志天璽元年吳郡臨平湖自漢末穢塞是  
時一夕忽開除無草

宋書符瑞志吳孫權時靈龜出會稽章安

晉

晉書五行志泰康四年會稽彭蜺及蟹皆化為鼠甚衆大食稻

宋書天文志晉泰康八年九月星孛於南斗長數十丈十餘日

通志災祥畧泰康九年春正月會稽吳興地震

宋書天文志晉永康元年五月熒惑入南斗

宋書天文志晉永興元年九月太白入南斗

宋書符瑞志永興二年白鳥見海鹽

通志災祥畧晉永嘉六年秋七月火木金聚於牛斗

之間

宋書符瑞志晉建興三年八月甘露降新昌

晉書元帝本紀建興四年玉冊見於臨安

宋書天文志晉大興元年七月太白犯南斗

晉書五行志大興二年吳興東陽無麥禾大饑

晉書五行志永昌二年五月吳興大水



通志災祥畧大寧元年夏五月吳興大水

萬厯温州府志大寧元年初立永嘉郡建城時有白鹿銜花遂名白鹿城三年又有白鹿銜花止於固安之白巖山

晉書五行志咸和元年十月己巳會稽大雨震電

晉書五行志咸和三年九月二日壬午立冬會稽雷

電

通志災祥畧咸和四年秋七月吳興會稽大水

通志災祥畧咸和九年春三月丁酉會稽地震

宋書符瑞志晉咸和九年四月甘露降錢唐右鄉東

巷柳樹

晉書五行志咸康元年六月大旱會稽餘姚特甚

宋書符瑞志咸康二年四月甘露降永興縣戊午降

山陰縣又降武康縣庚申又降武康

宋書天文志晉咸康二年九月太白犯南斗因晝見

宋書天文志晉永和六年八月辛卯太白晝見在南

斗

通志災祥畧晉太和中六月會稽大旱災火燒數千家延及山陰倉米數百萬斛炎煙蔽天不可撲滅晉書五行志太和中會稽山陰縣起倉鑿地得兩大船滿中錢錢皆輪文大形至明旦失錢所在惟有船存

通志災祥畧太和六年夏六月吳興臨海大水

晉書簡文帝本紀咸安二年三吳大旱

宋書天文志晉寧康二年正月有星孛於女

宋書天文志晉太元元年四月丙戌熒惑犯南斗第  
三星丙申又掩第四星

通志災祥畧晉太元十一年春三月客星在南斗至  
六月乃沒

晉書五行志太元十五年吳興長城夏駕山石鼓鳴  
晉書五行志太元二十年五月癸卯上虞縣雨雹

通志災祥畧元興元年夏四月辛亥有流星起斗東

北行到須女

晉書五行志元興二年十月錢唐臨平湖水赤

萬厯紹興府志義熙三年若耶山五色雲見

通志災祥畧義熙八年春三月壬寅山陰縣地陷方  
四丈

宋

宋書符瑞志永初元年七月戊戌鳳凰見會稽山陰  
冊府元龜元嘉三年閏正月己丑甘露降吳興

宋書符瑞志元嘉十一年六月海鹽獲白鳥以獻

通志災祥畧元嘉十二年夏六月吳興大水

宋書符瑞志元嘉十三年甘露降武康董道益家園

樹

宋書符瑞志元嘉十三年九月己酉會稽郡西南向  
曉忽大光明有青龍騰躍凌雲久而後滅吳興諸  
處並以其日同見

宋書符瑞志元嘉十八年八月庚午會稽山陰獲白

鳩眼足俱赤

宋書符瑞志元嘉十九年四月餘杭獲白龜以獻二  
十年四月復獲白龜

宋書符瑞志元嘉二十年七月吳興郡後池芙蓉二  
花一蒂

宋書符瑞志元嘉二十一年十月己丑永嘉永寧見  
黃龍自雲而下

冊府元龜元嘉二十三年嘉興鹽官野稻自生三十

許種

宋書符瑞志元嘉二十四年四月白雀產鹽官民家  
七月乙卯木連理生諸暨會稽太守羊元保改連  
理所生處康亭村為木連里

宋書符瑞志元嘉二十五年八月辛亥黃龍見會稽  
宋書五行志孝建元年八月會稽大水

宋書天文志孝建二年五月乙未熒惑入南斗十月  
甲辰又入南斗



冊府元龜孝建三年七月庚午嘉禾生吳興武康  
宋書符瑞志大明元年二月己亥諸暨縣獻白麕  
通志災祥畧大明元年夏五月吳興大水

冊府元龜大明四年六月戊戌木連理生會稽山陰  
宋書符瑞志大明五年四月辛亥甘露降安吉乙卯  
又降烏程

通志災祥畧大明七年浙江東諸郡大旱

宋書符瑞志永光元年四月己亥白雀見會稽

宋書符瑞志泰始元年嘉禾生會稽

宋書符瑞志泰始二年八月丙辰四眼龜見會稽丙

寅六眼龜見東陽九月烏程獻白烏

宋書符瑞志泰始六年四月木連理生會稽

宋書天文志泰始六年八月壬辰熒惑犯南斗

冊府元龜泰始六年九月己巳八眼龜見吳興

宋書符瑞志泰始七年二月戊寅木連理生錢唐

宋書符瑞志泰豫元年四月乙酉醴泉出山陰

宋書天文志元徽三年九月癸卯太白犯南斗第三星

宋書符瑞志元徽四年十一月乙巳甘露降烏程余山道人慧獲蒼玉太守蕭惠開以獻

南齊書祥瑞志元徽四年醴泉出昌國白鹿山

宋書五行志昇明二年二月於潛翼異山一夕五十  
二處出水漂流民居

宋書符瑞志昇明二年十一月甘露降吳興長城卞山

齊

南齊書祥瑞志建元二年五月白雀見會稽永興上

虞縣楓樹相去九尺合成一幹

南齊書五行志建元二年吳興大水

南齊書祥瑞志永明元年鹽官內樂村木連理

南齊書天文志永明元年八月甲戌熒惑犯南斗第

五星甲申太白犯南斗第四星

冊府元龜永明二年五月白雀見會稽永興縣

南齊書祥瑞志永明二年七月烏程陳文則家木連理

南齊書天文志永明三年八月丁巳熒惑犯南斗第五星

南齊書祥瑞志永明六年山陰縣孔廣家園檉樹十二層會稽太守隋王子隆獻之種芳林苑鳳光殿西

南齊書祥瑞志永明七年六月鹽官縣獲白雀是年

越州獻白珠自然作思惟佛像長三寸又吳郡太守江敷於錢唐縣獲蒼玉璧一枚以獻又主書朱靈讓於浙江得靈石十人舉乃起在水深三尺而浮刻為佛像

通志災祥畧永明九年秋八月吳興大水

梁

隋書天文志梁天監元年八月壬寅熒惑守南斗  
隋書天文志梁普通六年三月丙午歲星入南斗

梁書武帝本紀中大通三年吳興生野穀堪食

隋書天文志中大通六年四月丁卯熒惑在南斗

通志災祥畧梁大同五年冬十月辛丑彗星出南斗

陳

隋書天文志天嘉二年五月己酉歲星守南斗

隋書天文志天嘉三年八月癸卯月犯南斗丙午月

犯牽牛

南史後主本紀禎明二年臨平湖草舊塞忽然自通

隋

通志災祥畧開皇六年春二月乙酉浙大水

隋書天文志開皇八年十月甲子有星孛於牽牛

隋書天文志大業九年五月丁未熒惑逆行入南斗

隋書天文志大業十二年九月戊午有二枉矢出北

斗魁委曲蛇形注於南斗

唐

唐書天文志武德二年七月戊寅月犯牽牛



唐書天文志武德八年冬太白入南斗

唐書天文志貞觀十九年七月壬午月掩南斗

唐書五行志貞觀二十二年夏越州水

唐書天文志永徽三年正月壬戌太白犯牽牛

唐書五行志永徽四年夏婺州旱甚

唐書五行志永徽六年婺州水害稼

唐書五行志顯慶元年九月括州暴風雨海溢

唐書天文志顯慶五年二月甲午熒惑入南斗六月

戊申復犯之

唐書五行志總章二年六月括州大風雨海溢

唐書五行志咸亨四年七月婺州大雨山水暴漲

唐書五行志文明元年七月溫州大水

文獻通考垂拱四年三月雨桂子於台州旬餘乃止  
文獻通考永昌元年明州雌雞化為雄

唐書五行志長壽二年台州蝗

唐書五行志證聖元年六月睦州隕霜殺草

唐書五行志神功元年三月括州水壞民居

唐書五行志神龍二年諸暨縣治東五里木連理

文獻通考神龍二年四月己亥雨毛於越州之鄞縣  
文獻通考景龍四年五月丁丑剡縣地震

嘉興府志景雲二年秋嘉興新城鎮夜間異香襲人  
有聲如冰雹及旦泥沙中多金因建雨金岳宮

唐書五行志開元十七年八月丙寅越州大水壞城  
唐書天文志開元二十二年七月辛丑熒惑犯南斗

萬厯紹興府志天寶五載山陰縣張氏墓側出泉如

醴又產芝二本各九莖

唐書玄宗本紀天寶十四載天有聲於浙西

唐書五行志大厯二年秋浙東西水災

唐書天文志大厯二年九月乙丑熒惑犯南斗六年  
有星光燭地長五丈餘出發女西流入天市垣

唐書天文志大厯十年正月甲寅歲星熒惑合於南

斗

唐書五行志大厯十年七月杭州海溢

唐書五行志貞元六年浙西大旱井泉竭

唐書天文志貞元十九年熒惑入南斗

唐書五行志貞元二十一年夏越州鏡湖水竭

唐書五行志永貞元年秋浙江旱

唐書五行志元和元年夏浙東大疫

唐書五行志元和四年秋浙西旱

唐書天文志元和九年七月太白入南斗至十月乃

出晝見熒惑入南斗因留犯之

唐書五行志元和十一年五月衢州山水害稼深三

丈毀州郭

唐書五行志元和十二年越州台州水害稼

唐書天文志元和十三年三月熒惑入南斗逆留至  
於七月大如五升器色赤而怒乃東行

唐書天文志元和十五年八月己卯月掩牽牛

唐書天文志長慶二年十月甲子月掩牽牛中星

唐書五行志長慶四年夏湖州大雨水太湖決溢睦

州山水暴出

唐書五行志寶歷元年秋浙西旱

唐書五行志太和二年越州大風海溢

唐書天文志太和三年十月熒惑入南斗

唐書五行志太和四年十月浙西火

唐書天文志太和五年三月熒惑犯南斗杓次星

唐書五行志太和五年六月雨浙大 Water 害稼

唐書五行志太和六年二月湖州大水春浙西大疫  
唐書五行志太和七年秋浙西水害稼

唐書五行志開成三年湖州水溢入城處州平地水  
八尺有餘

文獻通考開成四年溫台明等州饑

唐書天文志會昌六年二月丙申月掩牽牛

唐書五行志咸通中吳越有鳥極大四目三足鳴山

林其聲曰羅平



唐書五行志咸通十年兩浙疫

唐書五行志咸通十三年四月庚子朔浙東西地震  
文獻通考中和二年嘉興馬生角

唐書五行志中和三年三月浙西天鳴聲如轉磨

唐書天文志乾寧元年夏有星隕於越州後有光丈  
餘狀如蛇

文獻通考光化三年九月浙江水溢壞民廬舍

唐書五行志天復三年三月浙西大雪平地三尺餘

唐書天文志天復三年十一月丙戌太白在南斗去地五尺許色小而黃至明年正月乃高十丈光芒甚大

五代

五代史司天考唐天成三年七月乙卯月入南斗魁  
閏八月戊申月犯南斗魁

五代史司天考唐長興元年八月己亥月犯南斗

萬厯紹興府志晉天福二年紹興府治東二十五里

文殊巖出醴泉又產芝數本

五代史司天考晉開運元年八月甲辰熒惑犯南斗  
五代史司天考漢乾祐元年四月甲午月犯南斗六  
月乙未月入南斗

宋

宋史天文志開寶五年填星熒惑合於牽牛

宋史天文志開寶九年六月乙卯熒惑入南斗

宋史五行志太平興國四年温州嘉禾九穗

宋史五行志太平興國五年温州獻芝草五本

宋史天文志雍熙四年十二月丁巳填星歲星合於

南斗魁

宋史五行志雍熙六年瑞安縣解木五片皆有天下

太平四字

宋史五行志淳化三年二月衢州甘露降

宋史天文志至道三年八月庚子熒惑掩南斗

宋史五行志咸平二年閏二月杭越睦衢婺諸州箭

竹生米如稻時民饑採之充食

宋史天文志咸平四年十二月太白晝見在南斗

宋史五行志景德二年兩浙饑

宋史五行志大中祥符元年四月温州獻瑞竹圖十

二月獻靈芝圖

宋史五行志大中祥符五年閏十月蕭山縣芝生李

樹上

宋史五行志大中祥符七年正月明州茹侯山石上

生芝草一本四莖

宋史五行志大中祥符八年十月衢州甘露降

宋史五行志天禧元年二月兩浙蝗蝻

宋史天文志天禧五年八月庚戌熒惑掩南斗魁第

二星壬戌犯南斗

文獻通考乾興元年湖秀州雨壞民田

宋史五行志乾興元年六月秀州湖田生聖米居民

取以食

宋史天文志天聖元年四月戊午熒惑犯南斗癸巳  
又犯南斗距星

宋史仁宗本紀天聖三年十月乙卯太白犯南斗  
宋史天文志明道二年十月癸巳太白犯南斗十一  
月癸亥朔太白犯南斗

宋史五行志明道四年六月乙亥杭州大風雨江潮  
溢岸六尺壞堤千餘丈八月甲申越州大水漂溺  
民居

宋史天文志景祐元年九月丙午熒惑犯南斗二年  
九月丁亥熒惑犯牽牛三年九月癸巳熒惑犯南  
斗

宋史天文志寶元元年八月辛未熒惑犯南斗

宋史五行志康定元年十月始興縣柑兩本連理

文獻通考皇祐二年十一月丁酉夜秀州地震有聲

自西北起如雷

宋史仁宗本紀皇祐四年十月丙子太白犯南斗



宋史天文志皇祐五年八月乙巳熒惑犯南斗

宋史五行志嘉祐三年正月温州火燔屋萬四千間  
宋史五行志嘉祐五年七月湖州水災

宋史五行志嘉祐六年七月兩浙淫雨為災

宋史五行志嘉祐八年三月鹽官縣地產物如珠可  
食水產菜如菌可為菹饑民賴之

宋史五行志熙寧八年八月兩浙旱

宋史五行志元豐五年七月永康縣生芝九本十一

月復生芝九本

宋史五行志元祐元年杭州民俞舉慶家七世同居

園木生連理

宋史五行志元祐八年兩浙海風駕潮害民田

宋史五行志紹聖元年秋湖秀等州海溢壞田

文獻通考紹聖四年夏兩浙旱

宋史五行志元符二年兩浙水患

宋史五行志元符三年八月丁巳熒惑犯南斗西第

二星

文獻通考建中靖國元年衢信等州旱

宋史天文志崇寧元年五月丁巳熒惑退入南斗魁  
戊辰犯南斗西第二星

宋史五行志大觀元年十月湖州水

宋史五行志大觀三年十月癸酉越州承天寺瑞竹  
一竿七枝幹相似其葉圓細生花結實詔送秘書

省

宋史五行志政和四年台州槐木連理

宋史五行志政和五年冬台州寧海縣進早禾一糲  
二米者凡三石

宋史徽宗本紀重和元年黃巖縣民妻一產四男

宋史天文志宣和三年正月戊申熒惑犯南斗丙辰  
又入南斗

嘉興府志建炎元年斗牛間有紫氣十月戊申嘉興  
縣丞趙子偁生子於官舍紅光燭天

宋史天文志建炎四年十一月填星歲星合於南斗  
文獻通考紹興元年紹興府有牛戴刃突入城市觸  
馬裂腹出腸時衛卒多犯禁屠牛者牛受刃而逸  
也

宋史五行志紹興元年六月浙西大疫

宋史五行志紹興元年十月乙酉臨安府越州大火  
十二月辛未越州大火

宋史五行志紹興二年二月丙子臨安大雨雹五月

庚辰臨安府大火亘六七里十二月甲午又火乙未旦乃熄

文獻通考紹興二年兩浙饑斗米千錢

宋史五行志紹興三年八月甲申地震湖州尤甚

文獻通考紹興四年四月霖雨至於五月浙東西郡縣壞圩田害蠶麥蔬蔴

宋史高宗本紀紹興四年六月熒惑犯南斗

宋史五行志紹興五年五月地震浙東西旱

文獻通考紹興六年春浙東大饑民多流徙

宋史五行志紹興六年六月乙巳夜地震有聲如雷  
餘杭為甚十二月臨安火燔萬餘家

文獻通考紹興十年浙東海饑人食草木

宋史五行志紹興十年十一月温州大火燔州學縣  
治及民居千餘

宋史五行志紹興十一年七月婺州大火燔州獄倉  
場寺觀幾半

宋史五行志紹興十四年五月丙寅婺州水蘭谿縣

水浸城市

文獻通考紹興十八年冬浙東饑紹興府大饑民之  
仰哺於官者二十八萬六千人賑之不給

宋史五行志紹興二十四年衢州饑浙東西旱

萬厯温州府志紹興二十五年十月朔景雲見樂清

縣東塔上其光照耀五色明年王十朋廷對第一

宋史五行志紹興二十七年紹興府大水



宋史五行志紹興二十八年浙東西沿江海郡縣大風水紹興湖秀為甚

文獻通考紹興二十九年紹興府洊饑

宋史五行志紹興三十年五月久雨傷蠶麥害稼辛卯夜於潛臨安吉三縣山水暴出壞民廬及田桑秋浙郡國旱浙東尤甚十月浙郡國螟螣

宋史五行志紹興三十二年六月浙西郡縣山湧暴水漂民舍壞田淮蝗飛入湖州聲如風雨餘杭錢

塘仁和皆蝗

宋史五行志隆興元年浙東西郡國螟害穀八月大  
風水紹興湖州崇德為甚紹興大饑

宋史五行志隆興二年夏餘杭蝗七月浙西大雨害  
稼

宋史孝宗本紀隆興二年八月己卯熒惑順行犯南  
斗

宋史五行志隆興二年湖秀州大水浸城郭壞廬舍

圩田

文獻通考乾道元年春紹興湖秀州大饑台明諸郡  
皆饑夏無麥

宋史五行志乾道二年正月淫雨至於四月夏寒浙  
郡損稼麥蠶不登八月丁亥温州大風海溢漂民  
廬

文獻通考乾道二年十二月庚午夜白氣如帶東西  
亘天出女入昴

宋史五行志乾道三年七月己酉臨安天目山暴水決臨安五鄉民廬八月湖秀州上虞縣水壞田廬積潦至於九月禾稼皆腐

宋史孝宗本紀乾道四年五月乙亥月入南斗

宋史五行志乾道四年七月壬戌衢州大水壞城漂民廬孳牧諸暨大水害稼

宋史五行志乾道五年夏秋溫台州大水漂田廬害稼黃巖縣為甚

宋史五行志乾道六年夏浙東旱溫台為甚秋浙西  
螟為害七年春秀婺州皆旱

文獻通考乾道六年衢州西安縣有物怪雞首人身  
高丈餘畫見於野

宋史五行志乾道九年婺處台溫州久旱無苗麥九  
月溫州火經夕燔縣治及民居七千餘家

宋史五行志淳熙元年浙東饑台處為甚七月壬寅  
錢塘大風潮決江隄一千六百六十餘丈漂民居

六百三十餘家仁和縣瀕江二鄉壞田圃

宋史五行志淳熙元年秀州民呂氏冰瓦有紋樓觀車馬人物芙蓉牡丹萱草藤蘿之屬經日不釋

宋史五行志淳熙二年秋浙西郡縣螟

宋史五行志淳熙三年四月癸巳天台臨海二縣大風雹傷麥八月台州大風雨連日海潮合溪流激決江岸壞民廬癸未大雨壞德勝北新江漲三橋及仁和錢塘餘杭三縣田湖秀州害稼浙東西郡

縣多水婺源州會稽嵎縣為甚

宋史五行志淳熙四年五月己亥夜錢塘江潮大溢  
敗隄八十餘丈庚子又敗隄百餘丈九月丁酉連  
日大風雨駕海潮敗隄三百餘丈餘姚縣敗隄二  
千五百六十餘丈上虞縣敗隄及梁湖堰運河岸  
明州大風駕潮壞定海鄞縣海岸七千六百餘丈  
文獻通考淳熙五年浙西旱

宋史五行志淳熙六年夏衢州水秋溫台湖秀等州

皆水壞圩田

宋史五行志淳熙七年八月台州軍民大饑是歲浙  
郡縣皆饑

宋史五行志淳熙七年紹興台婺皆大旱自四月不  
雨至九月

宋史天文志淳熙八年五月己卯熒惑入南斗

宋史五行志淳熙八年五月壬辰嚴州紹興大水漂  
民居十萬餘家田稼盡腐自七月至十一月臨安



府越婺衢嚴湖州皆旱

文獻通考淳熙九年春大無麥於潛昌化人食草木  
湖州紹興衢婺嚴明台州饑

宋史五行志淳熙九年六月乙卯飛蝗墮仁和縣界  
宋史五行志淳熙十一年二月新城縣深浦雨黑水  
終日六月甲申龍泉縣大雨水浸民舍壞扛梁七  
月壬辰明州大風雨山水暴出

宋史五行志淳熙十二年十二月台州雪深丈餘

文獻通考淳熙十三年二月庚申錢塘龍山江岸有大魚如象隨潮汐復逝

宋史五行志淳熙十三年八月戊寅安吉縣棗園村暴水發漂廬舍田稼殆盡

文獻通考淳熙十四年七月秀州饑臨安府九縣饑文獻通考淳熙十六年六月甲辰錢塘傍江居民得魚備五色鯽首鯉身事聞有司令縱之

宋史光宗本紀紹熙二年三月温州大風雨雹田苗

葉果蕩盡瑞安壞屋殺人

宋史五行志紹熙二年七月壬申天台仙居縣大水連夕漂沒民居壞田傷稼

文獻通考紹熙四年夏紹興府無麥

宋史五行志紹熙五年春浙東西郡縣自去冬不雨至於夏秋七月壬申慈溪縣水漂廬決田乙亥會稽蕭山餘姚上虞大風駕海潮壞隄傷田八月辛丑錢塘臨安新城富陽於潛大雨水漂沒田廬安

吉縣平地水丈餘冬無麥苗浙東西皆饑明州為  
甚人食草木

宋史五行志慶元元年六月壬申台州屬縣大風雨  
海濤山洪並作沒田廬溺人無算

文獻通考慶元二年六月辛未黃巖縣大雨水有山  
自徙五十里餘聲如雷草木塚墓皆如初而故址  
為淵潭時臨海縣清潭山亦自移

宋史五行志慶元三年秋婺州山陰蕭山富陽鹽官

淳安縣嘉興府皆螟

文獻通考慶元四年秋浙東西洊饑道多殍

宋史五行志慶元五年六月浙東西霖雨至於八月

台溫衢婺州水漂民廬多溺死

宋史五行志慶元六年五月嚴衢婺州皆大水積五

日漂廬害稼冬燠無雪桃李華蟲不蟄

文獻通考嘉泰元年浙西郡國洊饑嘉興為甚

宋史天文志嘉泰二年正月丁巳填星熒惑歲星合

於南斗

宋史五行志嘉泰四年五月不雨至於七月浙東西  
郡國皆旱

宋史五行志開禧元年夏浙東西不雨百餘日越婺  
嚴衢州大旱

文獻通考開禧二年紹興府衢婺州無麥

宋史五行志開禧二年五月庚寅東陽縣大水

宋史五行志嘉定元年五月浙江大蝗七月壬辰台

州大風雨駕海潮壞屋殺人

宋史五行志嘉定二年七月壬辰台州大風雨駕海潮漂二千二百八十餘家

宋史五行志嘉定三年四月甲子新城縣大水五月嚴衢婺州富陽餘杭鹽官新城諸暨淳安大雨水圯田廬市郭首種皆腐

宋史五行志嘉定四年四月丙申臨安府梵天寺火七月辛酉慈溪縣大水圯田廬人多溺者八月山

陰縣海水敗隄漂田四十里斥地十萬畝

宋史五行志嘉定五年五月嚴台州水壞田廬

文獻通考嘉定六年六月丙子嚴州淳安縣地震

宋史五行志嘉定六年六月丙子淳安縣長樂鄉山

摧水湧丁丑淳安縣山水暴出陷清泉寺漂五鄉

田廬百八十里丁亥於潛大水戊子諸暨縣風雷

大雨山洪暴作漂十鄉田廬錢塘臨安餘杭安吉

諸縣皆水十二月餘姚縣風潮壞海隄亘八鄉



宋史五行志嘉定七年六月浙郡蝗

宋史五行志嘉定八年八月浙郡皆旱明台衢婺溫

州為甚

宋史五行志嘉定九年五月大水紹興府嚴衢婺台  
處等州漂田廬害稼浙東蝗

文獻通考嘉定十年台衢婺州饑台為甚

宋史五行志嘉定十一年六月戊申武康安吉大水  
漂官舍民廬人畜九月己巳萬松嶺民居火燔四

百八十餘家

宋史五行志嘉定十二年鹽官海潮衝平野二十餘里

嘉靖寧波府志嘉定十四年七月十五日象山縣慶雲見於西山五彩間錯自是五穀豐登

宋史五行志嘉定十四年明台溫發衢等州蝨螣為災

宋史五行志嘉定十五年七月蕭山縣大水時久雨

衢發嚴三州暴流與江濤合圯田廬害稼

宋史五行志嘉定十六年浙郡國皆無麥禾

文獻通考嘉定十七年春餘杭錢塘仁和三縣饑

萬厯紹興府志嘉定間新昌俞時中家產芝草白玉

蟾為記

續文獻通考寶慶二年二月壬午太白歲星填星合

於女十一月熒惑填星合於女九月丁卯台州大

水壞屋溺民

續文獻通考紹定元年六月温州火燔六百餘家九月又燔五百餘家

宋史天文志紹定元年七月戊戌熒惑犯南斗

續文獻通考紹定二年九月台州海溢壞城

宋史五行志嘉禧四年紹興臨安嚴州饑

續文獻通考嘉禧十年八月台州大水十二年六月

台州又大水

續文獻通考嘉禧十三年七月辛丑嚴衢婺台處等

州大水冒城郭溺人

續文獻通考淳祐六年十一月永嘉縣東門大火燔

六百餘家

續文獻通考淳祐十二年十一月臨安大火

宋史理宗本紀寶祐三年五月浙江大水

續文獻通考景定元年五月熒惑入南斗留五十日

宋史理宗本紀景定三年二月臨安安吉屬邑水五

月丙寅雨雹

嘉靖寧波府志咸淳元年天雨鈔於鄞縣姜山陳氏  
共二日飛錢盈室名其堂為天鈔堂

萬厯金華府志咸淳五年蘭溪縣純孝鄉產瑞麥

宋史度宗本紀咸淳六年八月甲申瑞安樂清縣嘉  
禾生異畝同穎

續文獻通考咸淳六年九月台州大水

宋史度宗本紀咸淳八年八月會稽蕭山諸暨餘姚  
上虞大水

元

元史天文志中統元年五月乙未熒惑入南斗留五十餘日

溫州府志至元五年芝草生於溫州郡城之松臺山狀如連雲文彩煜然

元史五行志至元十四年九月湖州長興縣有金沙泉自唐宋以來不能常有忽漲然湧出可溉田數百頃有司以聞錫名瑞應泉

元史五行志至元十八年二月浙東饑

續文獻通考至元十九年麗水縣樟樹生梨可食

元史五行志至元二十二年秋慶元路大水傷人壞

廬舍三千九百九十區

元史五行志至元二十三年六月杭州路水壞田萬

七千二百頃

續文獻通考至元二十五年三月浙西大水杭秀湖

三州壞田稼



元史天文志至元二十五年九月癸卯熒惑犯南斗  
十二月乙酉太白犯南斗

元史五行志至元二十七年四月婺州螟害稼忽雷  
雨大作螟盡死歲乃大稔

元史五行志至元二十八年浙東水

元史五行志至元二十九年嘉興湖州紹興等路水  
續文獻通考至元二十九年十一月温州大火次年  
正月又大火

元史五行志元貞二年杭州火燔七百七十家

續文獻通考元貞二年九月温州拱北門火延燎城

市大半

續文獻通考大德元年七月十四夜温州颶風暴雨  
海溢浪高二丈壞田四萬四千餘畝屋二千餘區

元史五行志大德六年六月杭州嘉興湖州紹興慶  
元婺州等郡饑

元史五行志大德七年六月台州風水大作寧海臨

海二縣溺人

元史天文志大德七年九月辛未熒惑犯南斗乙亥

太白犯南斗

元史五行志大德八年五月杭州火燔四百家

續文獻通考大德九年六月二十八日縉雲縣水壞

民舍

元史五行志大德九年八月海鹽縣蝗

元史五行志大德十年五月嘉興水害稼

元史五行志至大元年春紹興慶元台州大疫

元史五行志延祐元年七月台州饑

續文獻通考延祐二年八月二十七日温州拱北門

火延燎至瑞安

元史五行志泰定元年二月慶元紹興二路饑八月

杭州饑九月紹興又饑十二月鹽官州海溢堤壞

侵城郭以石因木櫃扞之不止

元史五行志泰定二年四月杭州饑

元史五行志泰定三年八月杭州火燔四百七十餘家鹽官州大風海溢壞堤廣三十餘里袤二十里徙民居以避之九月長興州民家牛生一獸鱗身牛尾口目皆赤墮地即大鳴

元史五行志泰定四年正月鹽官州潮水大溢壞堤二千餘步四月又壞堤十九里發丁夫二萬餘人以木柵竹落碑石塞之不止

續文獻通考泰定四年十二月杭州火燔六百七十

餘家

元史五行志致和元年三月鹽官海堤復壞益發軍民塞之置石囤二十九里

元史五行志天歷元年八月杭州嘉興湖州水沒民田數千頃

元史五行志天歷二年四月浙西饑八月湖州旱

元史五行志至順元年閏七月嘉興湖州二路大水壞田萬六千六百餘頃紹興杭州慶元等路水沒

欽定四庫全書

卷一百八

田數千頃

元史五行志至順二年二月嘉興郡饑

元史五行志元統元年三月戊子蕭山縣大風雨雹  
拔木仆屋殺麻麥傷人夏紹興旱自四月不雨至  
於八月六月甲申杭州火

元史順帝本紀至元元年十月甲寅熒惑犯南斗十  
二月太陰犯南斗

元史順帝本紀至元二年三月乙丑太陰犯南斗浙

江旱自春不雨至於八月民大饑

元史五行志至元三年二月紹興大水

元史順帝本紀至元四年正月庚申太陰入南斗太白犯牛宿

元史天文志至元五年六月甲辰熒惑退入南斗魁內七月辛酉熒惑犯南斗魁尖星壬戌復如之甲子復如之

元史天文志至元六年三月壬申太陰犯南斗五月



甲子慶元路奉化州山摧水湧六月西安龍游二縣大水庚戌松陽龍泉二縣積雨水漲入城深丈餘遂昌縣尤甚水三丈餘桃源鄉山摧壓民居五十三家十月丁酉太白入南斗

元史五行志至正元年四月辛卯台州火乙未杭州火燔官舍民居萬五千七百餘間

元史五行志至正四年七月衢州西安縣大水温州颶風大作漂民居溺人

元史五行志至正六年慶元奉化州旱

元史五行志至正七年五月庚戌黃巖州無雲而雷  
八月壬午杭州浦中午潮退而復至

嘉興府志至正七年嘉興城西有鳥數千營巢於地  
圍八尺高五尺已而盜起詔州縣築城自嘉興始  
元史五行志至正八年五月乙卯錢塘江潮較八月  
更高數丈沿江民皆遷居以避之

元史五行志至正九年六月台州地震

元史五行志至正十年三月奉化州南山石突開其  
碎而大者有山川人物禽獸草木之形

元史五行志至正十一年十月衢州雨米如黍十二  
月台州大雷雨震電

元史五行志至正十二年紹興旱自四月不雨至七  
月次年慶元衢州婺州大旱

續文獻通考至正十三年正月十三日湖州黑氣亘  
天雷電大雨有物若果核與雨雜下五色間錯光

瑩堅固破開有實食之似松子仁人曰此婆婆樹  
子閏月十二日復雨三月十八日杭州亦雨

元史五行志至正十四年春台州大饑十二月乙酉

### 紹興地震

續文獻通考至正十五年七月攜李城東馬橋有白  
龍卧其上盲風怪雨忽闇暗如深夜大木盡拔壞  
民居百餘所

元史五行志至正十六年婺州處州大旱

續文獻通考至正十六年温州大風海舟皆吹上平  
陸高坡二三十里

元史五行志至正十七年正月己丑杭州降黑雨六  
月癸酉温州有龍鬬於樂清館頭江中火光如毬  
颶風急雨海水溢十二月丁酉慶元路象山縣鵞  
鼻山摧聲如雷

元史五行志至正十八年處州山谷中小竹結實如  
小麥民採食之

元史五行志至正十九年正月甲午慶元路地震十  
一月台州大雷電

續文獻通考至正二十年二月浙西諸郡震霆掣電  
雪大如掌頃刻積尺餘

元史五行志至正二十年夏會稽山陰二縣大疫  
明通紀至正二十年異雲見於杭州光映西湖

杭州府志至正二十年錢塘江潮不至

元史五行志至正二十一年明州象山縣竹穗生實

如小米可食溫州樂清瑞安二縣饑山谷間竹生  
實如穀民採以食明州松樹結實其大有盈尺者  
元史五行志至正二十二年山陰會稽二縣大疫

元史順帝本紀至正二十三年七月丁酉有星墜於  
慶元路光芒數十丈聲如雷

元史五行志至正二十三年十二月丁巳台州地震  
元史五行志至正二十四年黃巖州海溢颶風拔木  
禾盡偃

續文獻通考至正二十五年閏十月戊辰太白辰星  
熒惑聚於牛宿

元史五行志至正二十六年六月山陰縣卧龍山裂  
續文獻通考至正二十七年十月丁卯歲星太白熒  
惑聚於斗宿



浙江通志卷一百八

欽定四庫全書

浙江通志卷一百九

祥異

下

明

杭州府志吳元年杭州自四月不雨至六月知府王興福竭誠致禱雨澤霑足歲獲有秋

明實錄洪武二年四月癸巳台州獻瑞麥九月戊戌夜太陰犯南斗

嘉興府志洪武四年嘉興崇道院產靈芝

明實錄洪武四年七月辛酉太陰入南斗甲子龍游  
縣大雨水溢漂民廬

杭州府志洪武五年七月餘杭縣山水暴湧漂流廬  
舍及人畜

明實錄洪武五年八月乙酉餘杭縣義烏三縣大  
風山谷水湧漂沒廬舍及人畜甚衆

嘉興府志洪武七年五月十九日嘉興縣民李甲妻

一產三子

萬厯温州府志洪武八年七月温州大水平陽永嘉  
樂清瑞安沿江居民多淹沒

明實錄洪武九年六月壬辰錢塘仁和餘杭三縣水  
下田被浸者九十五頃

續文獻通考洪武十年正月丁酉金華處州雨黑水  
如墨汁池水皆黑

續文獻通考洪武十一年處州遂昌縣有大聲如鐘

自天而下

明實錄洪武十一年十二月庚戌辰星犯南斗

明實錄洪武十二年五月戊子青田縣淫雨山水大發沒縣治壞民居壬辰嚴州府大雨三日溪水漲壞官廨民舍

明實錄洪武十五年九月乙丑熒惑犯南斗

明實錄洪武十九年正月庚午太白犯牛宿四月乙亥熒惑留斗宿五月戊午七月辛巳八月丙戌熒

惑皆犯斗宿

嘉興府志洪武二十二年六月辛巳彗星見紫微側  
在牛度九十分有白光丈餘指西北行

明實錄洪武二十四年十一月乙未辰星歲星同度  
在南斗

明實錄洪武二十六年九月癸卯太陰入南斗

萬厯紹興府志洪武二十八年山陰縣天樂瀛湖塘  
掘得一物類小兒臂紅潤如生人云此肉芝也食

之延年

明實錄洪武三十年癸巳熒惑犯南斗杓第二星

萬厯金華府志建文四年蘭谿縣飛蝗食禾穗竹木

葉皆盡

明實錄永樂元年夏四月乙卯曉刻有星大如雞子

出斗宿東南行至游氣八月癸亥浙江風潮決江

塘萬四百餘步壞田四十餘頃湯鎮方家塘江隄

為風浪衝激淪於江者四百餘步溺民居及田四

千頃

明實錄永樂三年八月甲子朔杭州等府水淹民田  
七十四頃漂廬舍千二百八十間

明實錄永樂四年七月海鹽縣霖雨風潮決隄九月  
壬戌夜月掩南斗杓第二星

成化杭州府志永樂五年六月庚戌杭州沿江江隄  
淪於江十月癸未金星犯南斗魁第三星

明實錄永樂七年七月庚辰月犯南斗魁第二星甲



申麗水縣霖雨山水驟湧壞田廬漂人畜

台州府志永樂七年台州颶風拔木

明實錄永樂九年七月庚午湖州屬縣淫雨沒田萬  
三千三百八十頃辛未浙江潮溢衝決仁和縣黃  
濠塘岸三百餘丈孫家園塘岸二十餘里海寧縣  
風潮溺民塌城垣

明實錄永樂十年七月己酉平陽縣獻嘉禾百六十  
四本四穗者一本三穗者數本

萬厯紹興府志永樂十年諸暨縣學後小陶朱山產  
芝一本七莖

明實錄永樂十一年四月嚴衢西安壽昌等縣饑

杭州府志永樂十一年五月杭州大風潮仁和十九  
二十兩都沒於海平地水高數丈田廬殆盡溺者  
無算

嘉靖寧波府志永樂十一年七月戊子寧波府五縣  
大疫

明實錄永樂十三年六月己卯烏程等四縣水傷田  
九千四百四十三頃十月乙丑朔太白犯南斗魁  
第三星

萬厯金華府志永樂十四年五月金華大水漂屋疫  
癘大作六月大旱七月又大水

明實錄永樂十六年七月庚申月犯牛宿大星

萬厯温州府志永樂二十一年温州旱大饑

明實錄洪熙元年六月十五日黃巖縣大雨水高平

地五六尺傷禾稼六百二十頃湖州天雨連月烏程歸安長興三縣低田共沒六百三十四頃

明實錄宣德元年二月己丑有流星大如雞卵色赤有光起自南斗東南行至近濁五月甲寅浙江磐石衛颶風暴雨壞公廨倉廩人多溺者永嘉樂清二縣颶風急雨自旦至暮壞公私廨宇及壇廟

明實錄宣德三年浙江自四月不雨至六月及雨大

水淹沒禾稼

續文獻通考宣德六年九月熒惑犯南斗

明實錄宣德七年正月乙巳夜火星犯南斗杓甲寅  
昏刻有流星大如杯色赤有光出河鼓西南行至  
斗宿五小星隨之辛酉夜月犯南斗魁第二星丁  
丑夜金星犯南斗魁第三星浙江大水運司下砂  
等場淹沒鹽課六萬二百四十餘兩木火二星合  
於女宿

嘉靖寧波府志宣德十年寧波合郡大有年

明實錄正統元年十一月癸巳夜月犯牛宿中宿

杭州府志正統二年冬錢塘縣民家婦一產三男

明實錄正統三年正月辛亥月犯牛宿六月戊辰月  
犯牛宿錢塘等縣自五月以後彌旬不雨田禾槁  
死浙東俱亢旱無收

明實錄正統五年金華衢州自六月至七月淫雨連  
綿江河泛溢會稽臨海天台等縣五六月間大旱  
傷稼

台州府志正統八年三月台州大霜殺草四月至八月連雨麥腐又大風六種無收

明實錄正統八年十月鄞縣余士昌妻鮑氏一產三男

明實錄正統九年嘉興湖州江河泛溢隄防衝決淹沒禾稼

明從信錄正統十年三月寧波台州久旱民遭疾疫遣禮部王英祀南鎮至日即雨灌獻之夕雨止明

日又雨田野霑足

明實錄正統十一年正月戊午夜月犯南斗

明實錄正統十二年夏秋間紹興各縣亢旱無收

明法傳錄正統十四年六月紹興山忽移於平地又

地震白毛遍生七月熒惑入南斗

嘉興府志景泰元年正月嘉興大雪二旬烏雀幾盡

民饑夏淫雨傷稼大饑

台州府志景泰二年四月仙居縣梅花盡開



明實錄景泰二年八月辛未夜有流星大如杯色青  
白出天津北行至織女九月甲辰木星晝見於巳  
位夜月犯木星於斗宿十一月己亥月犯牛宿下  
四星

杭州府志景泰五年正月杭州大雪十餘日烏雀盡  
嘉興府志景泰五年二月嘉興大雪四十餘日

明實錄景泰六年海寧衛嘉興諸府自三月不雨至  
於六月九月甲午金星犯南斗魁第三星

萬歷紹興府志景泰七年春諸暨縣長山產芝

明實錄景泰七年四月己丑夜有流星大如杯光燭  
地出天市垣南行至牛宿二小星隨之五月湖州  
紹興久雨沒田禾十月壬寅月犯斗宿火星

嘉靖寧波府志景泰七年奉化縣大饑

杭州府志景泰七年冬西湖水竭

明實錄天順元年湖州四五月連雨苗爛杭州寧波  
金華嚴州六七月亢旱苗枯

明實錄天順二年九月甲寅金土二星合於斗宿金星犯南斗杓第二星

明實錄天順三年正月壬子五鼓東方有星如盞色青白有光起自牛宿東行至近濁

嘉興府志天順三年嘉興海溢

明實錄天順四年杭州嘉興湖州寧波紹興金華處州四五月陰雨連綿江河泛溢麥禾俱傷秀水嘉善二縣籽粒無收七月丁亥夜月犯牛宿

明實錄天順五年十一月己亥夜月犯金星在斗宿  
光芒相接土星火星聚於牛宿

明實錄天順七年八月癸丑有流星大如杯色赤有  
光出河鼓西南至斗宿五小星隨之九月丙子夜  
金星犯南斗魁第三星十月庚寅木火二星合於  
女宿

萬厯湖州府志天順八年湖州大水民饑

明實錄成化元年五月戊午火星留守斗宿六月壬

申火星犯斗宿魁第四星七月浙江各府州縣久  
雨稻苗腐爛歲饑

萬厯温州府志成化二年正月平陽縣颶風暴雨山  
摧平地水高八尺

續文獻通考成化二年正月丙戌太白曳入南斗

嘉靖寧波府志成化四年慈谿縣東北山鳴隱隱若  
雷乍大乍細迤邐至南而止是年賢科東北一區  
雋十餘人傳云賢人出里社鳴

續文獻通考成化五年二月癸巳金星犯牛宿

嘉靖寧波府志成化六年象山縣雨白霧行人鬚眉  
皆白數日而止

明實錄成化九年四月嘉興湖州水災嚴州青蟲遍  
地

嘉興府志成化九年八月嘉興府嘉禾生

明實錄成化十年春嚴州六縣多雨蠶麥無收

杭州府志成化十年杭州火延六七里

明實錄成化十一年十月辛巳月犯牛宿大星

嘉興府志成化十三年正月嘉興府震雷大雪又海  
溢溺民居

萬厯紹興府志成化十三年春紹興府瓜山裂

續文獻通考成化十三年十一月辛未冬至杭州大  
雷雨虹見

明實錄成化十三年寧波紹興台州水旱相繼

嘉興府志成化十四年八月二十日夜嘉興南方有

聲如運磨達旦十二月龍見於南方以十數

續文獻通考成化十四年八月吳越間淫雨不止各處出蛟將出時山中先有火燒地草木披靡分兩邊中成一徑以出至入水如驢形不見足浮游江中而去

嘉興府志成化十五年九月二十日申時嘉興地震至酉始定

杭州府志成化十六年有五色鳥翔錢塘學宮是年



李旻舉解首越三年大魁天下

杭州府志成化十七年昌化縣竹生花踰年結實如

麥

萬厯金華府志成化二十一年武義縣旱竹生實如  
麥民採食之可療饑括蒼彙紀宣平山中尤多竹  
米至千餘石

明實錄成化二十二年台溫二府自春徂夏不雨民  
饑臨海縣火燬軍民房舍一千七百餘區

續文獻通考成化間嘉善縣鄒亮妻初乳生三子再  
乳生四子三乳生六子

續文獻通考弘治元年二月十六日處州景寧縣北  
屏風山有白馬成羣從牛首山迤邐騰空而去

萬厯金華府志弘治元年金華府大旱至三載

嘉興府志弘治元年十二月嘉興府虹見雷雷雨冰  
凡四日

嘉興府志弘治二年夏秀州儒學後圃產芝連莖竝

蒂紫色有光如玉

杭州府志弘治三年五月仁和縣槎渡村有瑞麥六月杭州大雨龍井鳳凰兩山水暴漲淹田禾

萬厯温州府志弘治三年温州五縣皆饑七月平陽縣南鄉生嘉禾一本四穗

嘉興府志弘治五年嘉興大水民流移又大疫

萬厯金華府志弘治六年正月五日蘭谿縣大雷雨黑水五月至八月旱無麥禾

杭州府志弘治六年四月昌化縣大風拔木火光燒

山少頃驟雨如注

溫州府志弘治六年泰順縣鶴巢山產靈芝

萬厯溫州府志弘治八年二月永嘉縣暴風雹大者  
如拳小者如雞子傷屋瓦凡禽獸果實苗麥俱無  
嘉興府志弘治十一年嘉興郡境河港池井水皆沸  
騰高二三尺甚有至丈許者竟日始平

萬厯溫州府志弘治十一年八月初九日已刻溫州

有大星自南移東後有光一帶長百丈餘將入海  
光分為五聲若轟雷

温州府志弘治十二年四月樂清縣地震生白毛

台州府志弘治十三年台州大饑民食草木

嘉靖寧波府志弘治十四年象山縣大寒草木皆死

民饑

萬厯金華府志弘治十六年三月十八日武義縣大

風雨電拔木傾屋壓死二十餘人

杭州府志弘治十八年七月杭州驟雨山水大湧漂屋人多死者

嘉興府志弘治十八年九月十一日嘉興地震屋瓦皆鳴次日地生白毛金華府志十三日子時金華各縣地震台州府志台州地震有聲湖州府志湖州地震生白毛寧波府志鄞縣奉化同日地震

温州府志正德元年温州地震有聲如雷遍生白毛長者三四寸

嘉興府志正德二年十一月十一日小雪節嘉興府  
疾雷震天電火迅發二十八日虹見雷大發聲是  
冬桃李花蜂蠅集

萬厯湖州府志正德三年湖州大旱河水竭

萬厯湖州府志正德四年湖州大水民苦疾疫

嘉興府志正德四年七月嘉興驟雨如注至十月不  
霽禾盡爛大饑

萬厯金華府志正德四年十一月金華各縣大霜竹

木皆死經春不生民饑

萬厯湖州府志正德五年湖州復大水疫甚地震生

白毛

嘉興府志正德五年五月嘉興大水害稼民流移者

半

温州府志正德五年永嘉縣大饑

杭州府志正德六年正月杭州大雨雹地震自後頻

震



嘉興府志正德七年嘉興西山鄉麥秀兩岐

温州府志正德七年樂清縣瑞應鄉麥一本五穗六

穗餘多三穗四穗

萬厯金華府志正德八年金華縣池水結冰成花草

枝葉之形如畫

嘉興府志正德八年十二月石門縣樹枝凝霜狀如

垂露吸之味甘如飴

嘉興府志正德九年石門縣蝗不害稼已而嘉禾生

有一本數穗者

萬厯金華府志正德十年金華雨雹永康義烏縣尤  
大烏雀雞鶩傷者甚衆

萬厯紹興府志正德十一年新昌俞應肅家蠶鳴

嘉興府志正德十二年二月二十三日嘉興雷電雨  
雹大者如馬首十一月雷雹大雪十二月乃止

萬厯温州府志正德十二年四月永嘉樂清二縣地  
大震生白毛

萬厯温州府志正德十三年二月泰順縣大水壞民  
居六月永嘉縣大水

嘉興府志正德十三年秋嘉興大水

杭州府志正德十四年正月杭州屋瓦冰結皆成花  
朶如是者數日

嘉靖寧波府志正德十五年十一月鄞縣雷鳴地震  
明實錄嘉靖元年正月丙辰金星犯牛星四月乙丑  
朔木星犯斗宿下星

嘉靖寧波府志嘉靖元年慈谿縣夾田橋西忽漲一  
洲明淨圓起太守向錦曰沙洲漲夾田慈谿出狀  
元明年癸未邑人姚涑狀元及第

嘉興府志嘉靖元年七月二十五日嘉興自辰至酉  
大風拔木太湖水溢丈餘沒田禾

杭州府志嘉靖二年七月杭州大風潮八月再作拔  
木飄瓦衝去太平門外百餘家

萬厯湖州府志嘉靖三年湖州大饑

杭州府志嘉靖四年五月初七日杭州有大星自東  
流西曳尾長數十丈光明燭地亂落有聲十月晦  
大雷雨震電

萬厯温州府志嘉靖五年温州大旱民饑永瑞樂三  
邑尤甚七月二十四日初昏有星如月見於東方  
紅光燭天凡三日

台州府志嘉靖五年台州旱饑草木俱盡

明實錄嘉靖五年七月壬午朔遂昌縣雨電頃刻積

二尺殺豆麥

萬厯紹興府志嘉靖六年六月蕭山縣淫雨壞江塘  
平原成巨浸沿塘民家皆漂沒

杭州府志嘉靖七年四月餘杭縣旱忽然大風雷雨  
電大者如椀小者如雞子較雨點更密人民驚走  
牛馬奔逸

杭州府志嘉靖八年五月杭州雨黑水衣服汙染  
萬厯金華府志嘉靖八年五月金華大水九年九月

金華大霜晚禾不實

萬厯紹興府志嘉靖九年冬新昌呂廷安墓產芝五莖

溫州府志嘉靖十年五月瑞安縣海潮至有光如炬  
六月大火八月有黑龍從泥壘起遍天發火傾屋  
拔木不可勝紀

萬厯金華府志嘉靖十年九月九日義烏縣大火燬  
民居過半

萬厯湖州府志嘉靖十年九月湖州府城外地忽陷  
數十丈

萬厯湖州府志嘉靖十一年烏程縣庾村產芝數十  
本

萬厯温州府志嘉靖十一年七月二十四日泰順縣  
雨雹大如拳

嘉興府志嘉靖十二年十月八日四更嘉興見星  
唧唧有聲俄隕如雨



萬厯温州府志嘉靖十二年十一月九日夜温州星  
隕如雨

萬厯紹興府志嘉靖十三年七月諸暨新昌嵎縣溪  
流漲入城中水深丈餘新昌東堤決

萬厯温州府志嘉靖十三年七月温州旱八月颶風  
大作仆温州衛治及佛寺民居

紹興府志嘉靖十四年新昌縣竹生穗結實如小麥  
民採食之

萬厯湖州府志嘉靖十五年長興縣大風暴雨電閃  
晝晦壞民居不可勝計

嘉興府志嘉靖十六年夏嘉興大水

嘉靖寧波府志嘉靖十六年八月海潮入寧波郡城  
靈橋門老者云當出解元是年鄉試陳穆果占榜  
首慈谿縣夾田橋復起一洲明年戊戌會試邑人  
袁煒為榜首

萬厯紹興府志嘉靖十八年五月紹興大水衢婺嚴

三府暴流與江濤合入越城高丈餘沿海居民溺  
無算蕭山西江塘壞縣市可駕巨舟

萬厯金華府志嘉靖十八年六月六日金華八縣大  
雨浹旬北山蜃出田畝塘堰蕩盡東義永武四縣  
俱發洪蘭谿特甚水高丈餘民無樓閣者棲於屋  
脊

嘉興府志嘉靖十八年六月嘉興府旱蝗大饑

杭州府志嘉靖十八年杭州自三月不雨至於六月

井泉皆竭

杭州府志嘉靖十九年昌化縣東坡池不種而自生蓮有紅白二色重花如蒂

嘉興府志嘉靖十九年春嘉興大饑多鬻男女於外六月十八日飛蝗蔽天食蘆葦竹葉無遺

明實錄嘉靖十九年九月乙卯夜火星犯南斗杓第二星

杭州府志嘉靖二十年昌化縣竹葉苞絡成穠和飴

為餅餌最佳其地遂得豐熟

萬厯紹興府志嘉靖二十年春紹興駱駝山鳴諸暨  
縣南隅張氏妻一產四子

台州府志嘉靖二十年七月十八日台州颶風拔木  
飛石大雨如注洪濤暴高數丈溺人無算

明法傳錄嘉靖二十一年八月丁酉火星犯南斗續  
文獻通考山縣雨黃霧路上行人口耳皆塞

嘉靖寧波府志嘉靖二十二年鄞縣戴鰲有莊名會

川產黃芝九莖次年又產一莖又次年枯竹生笋  
成林

嘉興府志嘉靖二十二年夏嘉興淫雨秋大水民饑  
明實錄嘉靖二十三年三月丁巳夜火星入南斗

杭州府志嘉靖二十三年杭州大無麥米價湧貴富  
者亦食半菽嘉興府志夏秋嘉興大旱禾稼不登  
明實錄嘉靖二十三年鄞縣人兵部尚書張邦奇之  
母年百歲

杭州府志嘉靖二十四年杭州大饑民多殍七月雨  
雹

嘉興府志嘉靖二十四年嘉興旱道殣相望次年大  
疫

嘉靖寧波府志嘉靖二十四年寧波諸縣大荒

萬厯紹興府志嘉靖二十四年紹興合郡連年大旱  
湖心皆為赤地

台州府志嘉靖二十四年台州大旱無麥民多殍

萬厯温州府志嘉靖二十四年温州大饑

温州府志嘉靖二十五年九月二十日五更瑞安縣  
天晴月朗海上閃色如金片或曰此天花也其年  
必豐已而果然

萬厯温州府志嘉靖二十六年泰順縣火延燎官廨  
鼓樓及民居五百餘家

嘉興府志嘉靖二十七年夏嘉興旱十一月十一日  
丑時雷電大雨虹見



萬厯温州府志嘉靖二十八年冬平陽縣大火十二  
月朔瑞安縣有龍自嘉嶼鄉起大雨雹擊死羽蟲  
無數

嘉興府志嘉靖三十一年春嘉興白晝間望見秦駐  
山軍馬縱橫金戈閃爍及追而即之無有也八月  
又然海上夜行者見之光明

温州府志嘉靖三十一年五月五日五更温州有星  
赤色尾長拖青從西方飛過平陽嶺前山墮海中

其光燭天有聲如砲

嘉興府志嘉靖三十四年嘉興產白雀

嘉靖寧波府志嘉靖三十四年象山縣麥與粟有一

莖四穗者柏木生花如雞冠

杭州府志嘉靖三十四年七月杭州大火自熙春門  
頃刻遍於四方燒軍民廬舍萬餘間

嘉靖寧波府志嘉靖三十四年象山縣大風拔木傾  
縣治十七夜霓見於北山慈谿縣下黑雨

嘉靖寧波府志嘉靖三十六年定海縣獲白鹿總督  
胡宗憲令徐渭作表以獻

溫州府志嘉靖三十六年六月樂清縣竹蓋山摧見  
二石劍李用妻一乳三子

明法傳錄嘉靖三十七年閏七月淳安縣雨雹

萬厯金華府志嘉靖三十九年蘭谿縣三十四都徐  
環家產瑞粟六穗者一本五穗四穗者各二本三  
穗者四本二穗者甚多

萬厯湖州府志嘉靖三十九年烏程縣峴山產芝數

十本

續文獻通考嘉靖三十九年四月嘉興湖州地震屋  
廬搖動如帆河水撞激魚皆躍起

萬厯湖州府志嘉靖四十年正月湖州雪雷是年大  
水無禾次年又大水

嘉興府志嘉靖四十年嘉興自四月雨至五月苗種  
淹沒田成巨浸

明法傳錄嘉靖四十年六月朔昏中有星流牛女間  
墜地如雞子光燭天

續文獻通考嘉靖四十年閏五月至十月嘉湖淫雨  
不息平地水高數尺禾沈水底民大饑

嘉興府志嘉靖四十一年三月十二日嘉興有黃白  
二龍合股由太湖而來後一青龍隨之自陡門至  
峽石東南入海傷屋宇千數隨雨雹

嘉興府志嘉靖四十二年四月十八日海鹽午潮候

有馬數萬乘潮而來內有一大如樓房者逐隊沿塘羣走至二十里復入海響振非常

萬厯温州府志嘉靖四十五年正月一日夜分温州地震生白毛

萬厯金華府志嘉靖四十五年二月十八日夜蘭谿縣大雨雹如雞卵屋無完瓦

嘉興府志嘉靖四十五年十一月十一日四更嘉興有大星隕羣星數百隨之

萬厯紹興府志嘉靖四十五年新昌縣呂光遷光新家  
有紫荊花異枝合本鄞縣志大學士余有丁之  
祖年百餘

萬厯紹興府志隆慶元年諸暨縣民袁氏妻一產三  
男

台州府志隆慶二年七月台州颶風大作海溢天台  
諸山水合衝府城溺人無數壞田地十五萬餘畝  
廬舍五萬餘區三日乃退仙居縣蜃發山推

萬厯温州府志隆慶二年七月温州大風雨漂沿海  
民居田地無算

萬厯金華府志隆慶二年金華自五月不雨至於八  
月

萬厯紹興府志隆慶三年諸暨珠嶺民邵氏養蠶力  
不能喂棄之山中後皆成繭八月嵎縣北風大作  
逆溪流入城水深一丈三尺

萬厯紹興府志隆慶四年諸暨縣豐江周氏妻一產



三男

續文獻通考隆慶五年三月杭州栗樹生桃

溫州府志隆慶五年六月泰順縣二都水窟中有氣  
如霧色赤

嘉興府志隆慶六年嘉興縣嘉禾生

嘉興府志萬厯元年海鹽縣有大鳥如舟翅類車輪  
空濛作風雨聲展轉於波浪之上明年海嘯

萬厯金華府志萬厯二年三月蘭谿縣大風雨雹撒

屋拔木八月金華縣北山蜃出裂土成坑者數十處田堰壞盡

萬厯温州府志萬厯二年六月温州大風雨七晝夜永嘉沿溪民多溺死瑞安縣山摧地裂壓人畜八月樂清縣大雨水浸半壁

嘉興府志萬厯三年五月嘉興大風海潮湧入海鹽城平地三尺沿塘民居漂沒月餘亢旱大荒

杭州府志萬厯三年六月初一夜杭州怪風震濤決

錢塘江岸數十丈漂官民船千餘艘

萬厯紹興府志萬厯三年六月上虞餘姚二縣大風  
雨海潮溢有火光飛入上虞城內河水以器擊之

火光輒現

萬厯金華府志萬厯三年金華大旱禾盡槁

杭州府志萬厯五年杭州火燒千餘家

嘉興府志萬厯六年正月六日夜嘉興見有星如日

西移衆星隨之

金華府志萬歷七年五星聚於婺女

嚴州府志萬歷七年嚴州青蟲食田禾桐廬分水二縣尤甚

嘉興府志萬歷七年十二月嘉興府冬至前一日大雷虹見

舊浙江通志萬歷八年象山縣地震九年嘉興湖州大水台州旱蝗

會稽縣志萬歷十四年會稽縣民傅忠年一百歲妻

謝氏亦一百歲五世一堂縣令陳國器申詳督學  
巡按具題詔賜七品冠帶給銀建坊曰百歲齊眉

陳國器傳氏堂聯孫子生孫五代幸逢  
全盛世老人偕老百年共樂太平春

明從信錄萬歷十五年秀水縣思賢鄉有異鳥集於  
樹竟日是年水災

紹興府志萬歷十五年山陰會稽蕭山餘姚上虞自  
秋雨至冬至始晴大饑次年又淫雨疫癘交作

嚴州府志萬歷十六年嚴州大饑且疫嘉興府志嘉

興大水且疫餓殍盈野紹興府志紹興合郡大饑  
嘉興府志萬歷十六年平湖縣有白龍騰海上紅光  
滿天修撰沈懋孝見龍首半垂兩角間有金冠紫  
衣之神仗劍而立長尺餘龍忽戲吐頷下珠光色團  
藥大於斗

嘉興府志萬歷十七年嘉興大旱民食木皮

金華府志萬歷十七年金華八縣旱自十五年至此

餓殍載道

杭州府志萬曆十七年八月海寧縣地震

金華府志萬曆十八年湯溪縣甘露降

金華府志萬曆二十年蘭谿縣大火

萬曆温州府志萬曆二十一年樂清縣旱大饑十月

初五日有龍自寒坑經白溪入海雨雹大如碗飛

砂走石

杭州府志萬曆二十二年五月錢塘縣有瑞麥

萬曆温州府志萬曆二十二年六月朔樂清縣趙應

雲家乾井中火起如斗大升屋簷遍於庭若覆絳  
紗踰時跨屋飛入雲中光燭數十里

嘉興府志萬厯二十三年嘉興元旦雷又大雪匝月  
鳥雀多死金華府志金華府金蘭東義四縣大雪  
四十餘日牛馬多斃山谷人有饑死者

續文獻通考萬厯二十四年五月二十五日定海縣  
鎮遠門樓被雷火燒焚內貯軍器杭嘉湖三府自  
五月不雨至七月八月雨如注狂風交作經數日



夜不息山洪暴發廬舍傾圯圩岸崩頽郊原皆成  
巨浸

嘉興府志萬厯二十五年二月二日嘉興雨黑水  
紹興府志萬厯二十六年諸暨縣竹生米每節一粒  
民採食之呼為箭米

金華府志萬厯二十六年立夏金華有飛雪八縣大  
旱粒米無收民饑

嚴州府志萬厯二十七年四月嚴州大水竹生米民

賴以食

紹興府志萬歷二十八年山陰會稽二縣大饑

杭州府志萬歷三十年五月杭州大雨龍井山水出  
頃刻高四尺

紹興府志萬歷三十年七月紹興大風雨各縣人多  
溺海潮驟入城漂石梁里許方沈

杭州府志萬歷三十二年海寧臨安二縣地震

金華府志萬歷三十二年十一月初九夜金華八縣

地震

嘉興府志萬厯三十二年平湖學宮前地湧出醴泉  
紹興府志萬厯三十五年閏六月諸暨縣山中出蛟  
洪水泛溢溺人不可勝計

嚴州府志萬厯三十五年嚴州淫雨發洪山摧石轉  
漂屋溺人壞田萬餘畝

杭州府志萬厯三十七年杭州八月初七日至初十  
日驟雨晝夜不止湖南諸堤皆決

嚴州府志萬厯三十九年嚴州六縣大有春麥壽昌  
縣麥兩歧粟兩穗

舊浙江通志萬厯四十二年平陽縣仙壇山崩

紹興府志萬厯間山陰縣四十三都民俞概年百歲  
妻鮑氏九十九歲子仕朝至崇禎間年九十八歲  
婦韓氏一百有四歲

明法傳錄泰昌元年八月戊戌夜有白氣如練過牛  
女厯軫翼良久乃散

杭州府志天啓元年二月杭州桃樹一花中結實為  
桃李三月初五日杭州大火風烈延一十餘里次  
晚方熄六月又大火七月二十三日烈風驟雨海  
嘯沿江廬舍漂沒俱盡

嘉興府志天啓元年夏熒惑直據南斗中光焰噴射  
溫州府志天啓二年二月瑞安縣落土如飛塵積瓦  
分許九月平陽縣火

杭州府志天啓三年十二月二十二日杭州地大震

紹興府志天啓七年秋蕭山縣茅山忽一夕光氣挿  
天人往視見一石壁明澈如鏡山川人物毫末畢  
照踰月而晦

温州府志天啓七年樂清縣有星大如斗光燄燭天  
墜地徐行其聲颯颯然踰時入海

杭州府志崇禎元年七月二十三日浙江海溢自海  
鹽至曹娥衝海寧平野二十餘里人畜廬舍漂溺  
無算

舊嘉興府志崇禎元年七月嘉興颶風淫雨濱海及  
附郭居民被溺者不可勝計紹興府志紹興大風  
海水直入郡城街市可行舟山陰會稽蕭山上虞  
餘姚被溺者各以萬計

溫州府志崇禎四年四月溫州大雨樂清西巖寺山  
摧八月永嘉有龍從江中起循郡城南渡松臺山  
飛石拔木壞城垣及民居

嘉興府志崇禎六年六月二十五日嘉興龍見烈風

拔木碑石坊表飛去數十武

杭州府志崇禎八年十一月二十六日海寧地震

温州府志崇禎九年樂清縣東塔梓潼神座前生瑞芝

金華府志崇禎九年金華大旱民饑掘土中石有可磨粉者食之名觀音粉

杭州府志崇禎十一年六月杭州大水

杭州府志崇禎十二年五月三十日未時蝗從東



南來幾蔽天八月初八日蝗大集至闕外積二三寸

杭州府志崇禎十三年正月杭州大雨震電六月大疫十室而九八月旱禾盡槁米一石四金民採榆屑雜米以食

嘉興府志崇禎十四年正月十六日嘉興大雨城裂三月三日雨沙竟日六月二十九日蝗滿天食禾殆盡杭州府志杭州大旱飛蝗蔽天食草根幾盡人饑

且疫次年復旱蝗

金華府志崇禎十五年浦江縣地震

嘉興府志崇禎十六年嘉興府大饑斗米四錢人食

草根木皮

國朝

黃氏家譜順治二年錢塘縣贈吏部尚書黃思道之  
妻大學士黃機之祖母蔡氏年一百有四歲

杭州府志順治二年八月杭州梅花大放柳生桃如

粟

紹興府志順治二年冬嵎縣桃李杏俱實

杭州府志順治三年杭州桑樹生蝸牛食葉及豆苗

台州府志台州自三月不雨至於五月紹興府志

紹興自四月不雨至於八月寧波府志寧波旱斗

米四錢金華府志金東義永浦武湯七縣旱斗米

八錢

紹興府志順治四年餘姚縣化安山松樹有甘露

杭州府志順治六年二月二十日海寧縣下黑雨六月杭州地震生白毛

處州府志順治七年六月遂昌縣水青田縣饑斗米六錢

台州府志順治七年台州水

嘉興府志順治八年嘉興自春至夏大雨斗米四錢五分處州府志麗水遂昌二縣饑民掘山粉為食穀價每斛二分五釐

杭州府志順治九年六月杭州見日中有物吐出體  
勢輕揚向西飛二十三日復見或曰此天花也溫  
州府志十月十四日溫州雨綿如飛絮

杭州府志順治十年四月餘杭諸鄉多虎患一日太  
磯山有巨獸高八尺長丈餘紫鬣披覆白身黑尾  
人遙見其逐虎至水涯而食之食已則飲水以潤  
吻嗣是虎患頓息歷五月不知所之八月初三日  
有青龍見於西湖天空無雲及去始有雲護之

杭州府志順治十一年四月杭州地震

杭州府志順治十二年四月海寧縣潮溢至城下

金華府志順治十二年金華府金東永武湯五縣旱

民饑

處州府志順治十四年處州潦城外壽元山蜃出

杭州府志順治十四年十一月二十八日杭州大雷

電一冬無雪

台州府志順治十七年台州水

處州府志康熙四年麗水縣水

溫州府志康熙四年永嘉縣露凝樹枝其甘如蜜

杭州府志康熙四年十二月杭州火大風晝夜延燒

七里

杭州府志康熙六年夏杭州蝗不為災

杭州府志康熙七年六月十七日杭州地震

溫州府志康熙七年七月五日溫州大風雨壞城垣

廬舍

台州府志康熙八年仙居黃巖二縣火十二月十四

日大雷至明年正月初旬方止

杭州府志康熙九年四月大雨連日河水溢

金華府志康熙十年金華府金東永浦武湯六縣自

五月不雨至九月紹興府志紹興八縣旱處州府

志麗水縣旱蝗青田縣青蟲食苗

杭州府志康熙十一年閏七月杭州雨蟲食穗

杭州府志康熙十二年九月杭州火大風一晝夜自



鹽橋東延一十三里

處州府志康熙十四年麗水縣疫

杭州府志康熙十五年杭州四月雨至五月

杭州府志康熙十八年杭州旱

杭州府志康熙十九年錢塘江中岑石復見

錢塘縣志

江自古有岑石自漢武帝天漢五年淪沒久矣歲庚申四月望日海潮自東入小門分擊兩岸驅雷捲雪直上富春浮石自西逆潮而下遠望之如覆舟及稍近則石也長三丈

温州府志康熙二十年春温州地震夏至秋郡城

火燎民舍五千餘間

處州府志康熙二十年處州自三月大雨至於五月  
秋大旱至冬不雨

處州府志康熙二十年五月十二日宣平縣大萊山  
陷成一龍窟長一里許廣四十丈汪洋澄澈深  
不可測魚鼈出沒於松杉巖石間歷歷可數雖久  
旱不涸

溫州府志康熙二十一年二月溫州雨豆

金華府志康熙二十一年五月金華大雨三十餘日  
處州府志康熙二十一年五月處州玄妙觀前井鳴  
自辰至午

杭州府志康熙二十二年杭州正月雨至四月

處州府志康熙二十五年閏四月處州大雨水高於

城丈餘

鎮海縣志康熙二十九年春鎮海北鄉家牛生犢龍

首紅唇遍身肉鱗

紹興府志康熙二十九年秋紹興大雨山水洪齊發  
餘姚水高於城數日方退

台州府志康熙三十年十一月台州地震

金華府志康熙三十三年永康縣民周君慎妻楊氏  
一產三男

台州府志康熙三十八年八月台州大水平地高丈  
餘

鎮海縣志康熙三十八年鎮海縣北鄉民房姓者年

百歲

山陰縣志康熙四十四年四月

聖祖仁皇帝南巡至杭州山陰縣民王錫元與弟錫魁錫  
爵錫驥錫則皆同母生龐眉皓髮跪伏道旁恭迎  
聖駕問其年錫元與錫魁學生俱八十歲錫爵等三人各  
七十餘歲五人之婦皆結髮齊眉其家有女弟二  
人亦年近八十與其夫偕老合夫婦十四人壽盈  
一千七十餘歲

御書一門人瑞四字扁額以旌其閭

台州府志康熙五十六年天台縣饑且疫

金華府志康熙五十七年金華縣民張汝彩年百有  
一歲給銀建坊

康熙五十九年義烏縣生員吳一瀛妻賈氏年一  
百三歲給銀建坊

台州府志康熙六十年正二兩月間臨海黃巖仙居  
太平四縣雨豆穀穀粒倍常豆堅不可食箭竹結

實磨粉作食療痢症甚效

寧波府志康熙六十年三月望後鎮海慈谿餘姚上虞雨雹小者如碗大者如盆

康熙六十一年正月二十三日鎮海城守營兵丁盧大有妻虞氏一產三男

雍正元年壽昌縣原任守備李瑞生壽登百歲奉旨加遊擊銜食守備全俸給銀建坊書曰昇平人瑞

雍正二年七月十八日鎮海大雨海水溢鄞縣慈

谿奉化象山餘姚上虞仁和海寧海鹽平湖山陰  
會稽嵊縣永嘉同時大水鎮海鄉民避水者棲於  
屋脊或大木上見海上火光閃爍有龍橫身阻潮  
皆云是蛟門老龍巡海使者上其事奉

旨封為涵元昭泰蛟海龍神建廟於東門外

雍正三年桐鄉縣民妻邱唐氏年一百二歲奉

旨給銀建坊書曰貞壽之門

雍正四年六月浙江巡撫

臣李衛為欽奉



恩詔事題明浙江省老民老婦共五萬六千三十四口  
將應給絹布米石造冊報部本年十一月二十二  
日奉

上諭朕覽戶部奏銷本章見恩詔內賞給老人一項直  
隸各省七十以上至百歲以上老民老婦共一百四  
十二萬一千六百二十五名賞給絹布等件價銀共  
八十九萬餘兩米一十六萬五千餘石等語凡此老  
人但就民人而言如仕宦紳士商賈僧道皆不入此

數之內洪範以壽居五福之首而昔人稱七十為古  
稀誠以壽為難得而可貴也乃今日老人之多至於  
如此此皆由我

皇考聖祖皇帝六十餘年以來深仁厚澤休養生息凡山  
陬海澨僻壤窮鄉無不沐浴

鴻慈涵濡大化太和翔洽壽國壽民所以期頤耄耋龐眉  
皓首之人至數百餘萬之多所謂老者以壽終幼孤  
得遂長者皆我

皇考之賜也從此益加培養日積月累則民間之享高年介眉  
壽者更不知何如之衆矣此等老人躬際昌期年登上壽  
大抵皆居心忠厚力行善事之人即或有一二年少時未  
盡醇謹者亦必中年暮齒能自悔悟之人蓋一念修省即  
荷上天福祐也是國家有培養之恩而由本人能修善以  
祇承之非倖而致之也爾等百姓觀太平之盛事當歡欣  
鼓舞謹身修德以迓天休父與父言慈子與子言孝兄弟  
友恭夫婦和順比閭族黨之間相親相愛無詐無欺革

薄從忠循分守法盡除乖戾之氣為國家淳樸善良之民則天地祐善賜福長享遐年此必然之理也但生齒日盛食指繁多則謀生之計不可不講爾等百姓當重農桑以順天時勤開墾以盡地利務本業以戒游惰謹蓋藏以裕久遠而且節儉食用愛惜物力毋縱奢侈毋競紛華毋任意靡費以耗有用之財但顧目前而亡經久之計朕以勤儉先天下宮禁之中於食餘之物皆不忍棄必令人檢取收貯之數年以來所貯米粟已

至數十石之多朕臨御萬方尚多方撙節愛養以為  
加惠元元之本爾等小民安可縱口腹之所欲而忘  
物力之艱難乎爾等誠能體朕諄諄訓誨之意敦善  
行則心體安務本計則俯仰足惜財用則家室裕人  
心和樂風俗醇美同為壽考之人長享昇平之福豈  
非朕之所厚望哉著該部將朕此旨轉發直省督撫  
通行所屬郡邑鄉村咸使聞知特諭

雍正四年八月初旬杭嘉湖三府大雨

雍正五年七月十八日夜臨安孝豐兩縣出蛟山水陡發餘杭新城二縣亦被水安吉德清武康三縣俱山水淹沒田禾鄞縣慈谿鎮海亦大雨水發雍正五年九月仁和錢塘農民獻水田稻米瑞穀一莖兩穗三穗西安常山二縣旱田粟米嘉穀一本之中兩穗三穗四穗者遍於各鄉巡撫臣李衛具題奏

進欽奉

上諭

恭紀  
首卷 蒙

頒賜大學士九卿等觀看

雍正七年五月歸安縣居民王文隆家萬蠶同織  
瑞繭一幅長五尺八寸寬二尺三寸署浙江總督

臣性桂等具摺奏

進八月十八日欽奉

上諭

恭紀  
首卷 蒙

頒賜廷臣觀看

雍正七年九月初五日錢塘縣居民邵攀桂妻吳氏一產三男十月二十一日天台縣居民褚伯賢妻劉氏一產三男十一月初十日蕭山縣居民高耀妻潘氏一產三男

雍正八年七月初一日暨二十一日兩次雷雨玉環山衝開一河直通後蛟浦口時玉環適奉

旨展復興建城工轉運石料由新開河直達城下不勞人力鉅工告成



雍正八年八月初二日錢塘縣居民楊天成妻嚴氏一產三男九月初五日遂安縣居民洪文錫妻毛氏一產三男九月十九日仁和縣居民王錫九妻陳氏一產三男

雍正八年西安縣民孔正淑妻洪氏年一百歲奉旨給銀建坊書曰貞壽之門

雍正八年五月十三日恭遇

皇后千秋浙省文武官員齊集

萬壽宮望

闕行慶賀禮適五色慶雲蔚起吳山頂上異彩繽紛  
祥光照耀自寅至卯闔省官紳軍民萬目羣瞻懽  
忭稱慶

雍正九年天台縣生員陳光星壽登百歲奉  
旨給銀建坊書曰昇平人瑞

雍正九年六月十八日杭州府昌化縣太平鄉山  
民獲麥之場白鹿自來耆老聚觀咸稱上瑞因獲

以獻

雍正九年七月初一日臨海縣民項茂如妻林氏  
一產三男八月二十四日鎮海縣民陳道才妻應  
氏一產三男

雍正十年正月初九日永嘉縣民李天錫妻林氏  
一產三男

雍正十一年十二月十六日遂安縣民姜自周妻  
胡氏一產三男

雍正十二年五月歸安縣詳報月河鋪里民劉子  
晉之妻劉爾錫之母姚氏年百歲總督臣程元章

具題奉

旨給銀建坊書曰昇平人瑞

雍正十二年五月二十五日開化縣民畢懋增妻

姜氏一產三男

雍正十三年十月二十五日臨海縣民蔡榮宗妻

奚氏一產三男

浙江通志卷一百九